

Reakcije na najavu premijerke RS-a o borbi protiv korupcije

OSUĐENICI GLASALI ZA VLADU, U NJOJ I SJEDE

● Ekspoze Željke Cvijanović nije ponudio niti jedno konkretno rješenje, kaže Korajlić ● Prije godinu Vlada je formirala tim i ništa, podsjeća Crnadak

Predsjednica Vlade RS-a Željka Cvijanović, u ekspozeu koji je izložila pred Narodnom skupštinom, najavila je da će jedna od mjera njenog kabineta biti i donošenje strategija za borbu protiv korupcije. Pojasnila je da će iz strategije proistći cijeli niz mjera koje treba da preduzimaju različiti organi, uključujući i policiju, pravosuđe i svakog ko treba da identifikuje koruptivno djelovanje.

“To je važno zbog toga što je stvorena priča da su svi u društvu korumpirani. Došlo je vrijeme da to razdvojimo - onaj ko se bavi korupcijom treba da bude sankcionisan i ni u čijoj milosti”, naglasila je Cvijanović.

Poručujući da nema prostora za gubljenje vremena, nova premijerka RS-a poručila je da će njen tim odmah “pristupiti radu, jer tačno znaju u kom pravcu treba da idu”.

Već viđeno

Umorena od velikih riječi i obećanja, javnost u Republici Srpskoj smatra da ovom bh. entitetu ne treba nikakva nova strategija, već odlučnost svih institucija sistema da provode zakone, koji su normativno osposobljeni za sankcionisanje korupcije.

- Kada je u pitanju dio ekspozea Željke Cvijanović, koji se odnosi na “pojačane napore u borbi protiv korupcije”, moram prije svega reći da nije ponudio niti jedno konkretno rješenje ili nagovještaj šta će se to zaista raditi kako bi se Republika Srpska konačno aktivirala u borbi



Cvijanović na zasjedanju NSRS-a: Niz mjera protiv koruptivnog djelovanja

protiv korupcije. Čuli smo ono što već odavno slušamo - da se ne smiju svi etiketirati kao korumpirani, ali i da će se dati ime i prezime korupciji, kazala je za Oslobođenje Ivana Korajlić, predstavnik Transparency Internationala BiH.

Prema njenim riječima, nažalost, svi smo znali mnoga imena i prezimena koja ni do sada nisu procesuirana, uprkos očiglednim i veoma transparentnim zloupotrebama.

S druge strane, dodala je Korajlić, čuli smo da će se pisati nova strategija za borbu protiv korupcije, iako je već godinama o njoj govoreno i vjerovatno je završila u nečijoj ladici, pa bih voljela čuti šta će to nova strategija promijeniti.

- U ekspozeu je bilo i riječi o savjetu za borbu protiv korupcije, o kojem se također odavno priča, ali na kojem se ništa ne radi. Taktika je očigledno govoriti o savjetima, strategijama, komisijama i slično, a ne vidim gdje su u tome svemu pravosuđe i policija, na kojima bi tre-

bala počivati borba protiv korupcije, a ne na savjetima i komisijama. Umjesto toga, na pravosuđe se vrše pritisci, a u isto vrijeme kroz medije se to isto pravosuđe okrivljuje za sve nedostatke sistema kada je riječ o izostanku bilo kakvih rezultata u borbi protiv korupcije. Sve u svemu, od gospođe Cvijanović nismo čuli ništa novo, osim podataka o percepciji korupcije u Evropskoj uniji - ovi podaci iz BiH koje mi godinama šaljemo institucijama RS-a izgleda nisu relevantni, podvukla je Korajlić.

Predsjednik Upravnog odbora Udruženja građana Tender Zdravko Kecman kaže da je, prije nego što vidimo kojim to mehanizma Vlada misli da se uhvati ukorštac s korupcijom, teško dati i konačan stav o najavi donošenja nove strategije.

- Ali, činjenica je da je prema svjetskim mjerilima BiH među posljednjim državama po spremnosti njenih vlasti da se bore s korup-

cijom. Uostalom, najbolji primjer za to je oblast javnih nabavki gdje se zakon ne provodi, a pravosudne institucije sporo ili nikako reaguju na njegovo kršenje, podsjeća Kecman.

Nema očekivanja

Izvršni sekretar PDP-a Igor Crnadak kazao je da su “samim izborom i premijerka i Vlada izgubile kredibilitet zbog činjenice da su podržane od poslanika SNSD-a Miće Kraljevića, pravosnažno osuđenog za otmicu i da je u toj vladi ostao Petar Đokić, pravosnažno osuđen za privredni kriminal”.

- Podsjećam da je prije godinu Vlada RS-a oformila specijalni tim koji su činili ministri pravde i policije, sudije i tužioc, kako bi se izvršila revizija privatizacije, istražila korupcija. I ništa se nije desilo. Zato su očekivanja od ove vlade, što se PDP-a tiče mala, a po pitanju borbe protiv korupcije još manja, zaključio je Crnadak.

G. KATANA

KULT
UGOVOR O SARADNJI S VIJEĆIMA MLADIH

Institut za razvoj mladih KULT potpisao je jučer na Ilidži ugovor o saradnji s devet vijeća mladih/omladinskih savjeta iz BiH, a u sklopu inicijative Mladi odlučuju o demokraciji.

Samo jedan posto mladih u BiH vjeruju da mogu utjecati na politiku i društveno-ekonomski aspekt u BiH, a dešavalo se da manje od 25 posto mladih izađe na izbore. Većina mladih ne razumije dovoljno politički sistem u državi, što uveliko olakšava manipulaciju mladima tokom i nakon predizborne kampanje.

U 29 posto slučajeva mladi su odlučili ne izaći na izbore i glasati, jer nisu znali kojoj političkoj stranci ukazati povjerenje. Dvostruko je više mladih koji vjeruju da je nemoguće utjecati na proces donošenja odluka kroz mehanizam posrednog učešća, kao što je glasanje na izborima.

Ipak, na općim izborima održanim 2012. godine, procent izlaznosti mladih je bio visok, poredeći s podacima iz 2010. ili 2008. godine.

Međutim, kvantitet ne podrazumijeva uvijek i kvalitetu glasanja. Mladi često donose površne odluke za glasanje bazirane na predizbornim marketinškim kampanjama, a ne kroz kritički pristup utemeljen na revizorskim izvještajima i postignutim rezultatima političara, navode iz Instituta za razvoj mladih KULT.

Mladi odlučuju o demokraciji! - uključeno mladih u proces izbora, inicijativa je kojom će Institut za razvoj mladih KULT doprinijeti jačanju uloge građanskog društva u ostvarivanju ljudskih prava i demokratskih reformi, pospješujući građansko i političko učešće mladih u društvu, posebice tokom izbora i jačanju kapaciteta mladih u BiH, Moldaviji, Makedoniji, Kirgistanu i Srbiji.

RUSMIR MESIHOVIĆ

Uskoro uvezani svi domovi zdravlja FBiH

Ministar zdravstva FBiH dr. Rusmir Mesihović istakao je u nedjelju da je za ozbiljne reforme u zdravstvu potrebno od šest do osam godina, sumirajući rad ovog ministarstva u proteklih 730 dana u oblasti regulative i procesa informatizacije.

Govoreći na redovnoj sesiji Kruga 99 o temi “Reforma zdravstvenog sistema između želja i mogućnosti”, ministar je naveo da su Ministarstvo zdravstva i Vlada FBiH donijeli 13 reformskih zakona. Naglasio je da je prošle godine revidirana lista esencijalnih lijekova u koju su uvršteni i skupi lijekovi za maligna oboljenja, hepatitis i drugo, koji su najjeftiniji u regiji, javlja Fena.

Mesihović je naglasio važnost hardverske opreme za Kanton Sarajevo i Mostar. Elektronska kartica koja je povezana s Kliničkim centrom i sa Zavodom zdravstvenog osiguranja bila je gotova u oktobru, a do kraja ove godine bit će uvezani svi domovi zdravlja u FBiH. Prema njegovim riječima, u FBiH svi imaju zdravstvenu zaštitu jer po Zakonu o zdravstvenom sistemu FBiH, postoji modus



da svaki čovjek bude osiguran, a to je da 40 posto zaposlenih ljudi u FBiH plaća osiguranje za ostatak nezaposlenih.

Dodao je da pravno i zakonski svi ljudi imaju pravo na zdravstveno osiguranje, a praktično trebaju zatražiti zdravstvenu zaštitu, odnosno, trebaju se prijaviti na biro rada.

- Naše zdravstvo je zasnovano na modelu solidarnosti, kazao je Mesihović i dodao kako treba iznaći najbolje rješenje u kojem će svi građani imati adekvatnu i kvalitetnu zdravstvenu zaštitu. Zaključio je kako je potrebno provesti u praksu reformske zakone koji su u skladu s EU, i svakako raditi na jačanju pružanja usluga, resursa i finansiranja.

ATAK NA DOMAĆU PROIZVODNJU

Nove laži Avaza o Klasu

Dnevni avaz ne prestaje sa svojim nasrtajima na domaću proizvodnju. Omiljena meta, naša kompanija Klas, ponovo je tema teksta u kome se iznosi čitav niz laži i to bez jednog argumenta. U cilju zaštite naše stoljetne tradicije, naših proizvoda, naših radnih mjesta, oštro demantiramo najnovije laži plasirane u Avazu: radnici Klasa su svojim potpisima stali uz menadžment, Sindikat i poslodavce jer želimo sačuvati naš hljeb i hljeb kojim snabdijevamo tržište Kantona Sarajevo i cijele BiH. Više od dvije hiljade uposlenika grupacije Sarajevska pivara, Klas i MIMS svojim su potpisima dokazali da više nećemo pristajati na konstantno uništavanje domaće proizvodnje i naših firmi. Naše je pravo da radimo i da se borimo za svoja radna mjesta tim prije što mi hranimo ljude, a ne trujemo ih lažima kako to čini Dnevni avaz, saopćeno je jučer iz Klasa.

Novinarima Avaza smo otvorili vrata, ovaj put nisu morali provaljivati, i dobili su priliku da pitaju i čuju odgovore. Avaz se u svojim tekstovima i dalje poziva na neimenovane radnike i plasira svoje izmišljotine. Kada su nam naše kolege iz Vegafruta poslale podršku da radimo, oni su slagali da je



ta podrška upućena za uništavanje naše proizvodnje. Sindikat PPDIUT je na konferenciju za medije u Klasu pozvao i predstavnike ostalih grupacijskih firmi: Avaz nije imao pitanja za njih, ali zato iz dana u dan nudi svoje izmišljene odgovore. Klas će, zajedno s kolegama iz Vegafruta, Sprinda i ostalih grupacijskih firmi, iskoristiti svoje pravo i na svim relevantnim adresama tražiti zaštitu naše proizvodnje i naših radnih mjesta od konstantnih napada iz Avaza. Grupacije unutar kojih poslujemo, dato je napisano i Avazovim novinarima, platile su više od 600 miliona doprinosa i poreza u posljednjih osam godina, a sami Selimovići 1,7 miliona. Zašto to toliko smeta Avazu?, pita Klas u saopćenju za javnost.